



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 6

Yangia anidakangma :

f Tir Yimym

ig tiryimym@aolima

yt tir yimym

TAPAK 3

Tripura CM-i PM Modi dang Rs 20 crore grant atema pelar

Menden lemdangba sülenang Rahul indang yatra nung adentsü: Akhilesh Yadav

VOL. XXI ISSUE NO. 128 (ADOK 128) DIMAPUR SANGTENNÜ (TUESDAY) TSÜKLAI (FEBRUARY) 20, 2024 ₹ 5.00

Feb 24 nü sorkar office lapoktsü

Kohima, February 19, 2024 (DIPR): Nagaland Governor-i February 24, 2024 nü Kohima nung state sorkar office ajak working day asütsü metetdaksüogo.

February 26, 2024 nungi 14 buba Nagaland Legislative Assembly session pezübuba tenzüksü aliba dak sendakba

maparen inyaksü atema iba lemtet agiogo.

Iba anogo nung Administrative Heads aser Heads of Departments-i pei pei department nung ketdangsürtem aser staff ajak office-i arutsü mapa inyaksü metetdaksür, ta Nagaland Governor-isa ashi.

Manipur district 2 nung sorkar office-i aoger maliasü

Imphal, February 19, 2024 (Agencies): Manipur home department-i "No Work, No Pay" inyakyim tenzüksü tetuyuba agüjaka Churachandpur aser Pherzawl district tem nung Hombarnü sorkar office nung mapa inyakerem maliasü.

Ajisüaka, ITLF-i Hombarnü state sorkar ketdangsübaren tenzuka aotsü temelaba agütsüba metetdaksüogo.

"Public taginüba nung ajemdaker state sorkar office tem shibangtsüba lapoktsür. Churachandpur district DC aser SP na lendong nungi jenbua lidaksütsü atema tena dang district toktsür aotsü tetuyuba agütsü. Ajisüaka tenati taküm mapayui district-i meyipa aruba osang angashiogo anungji tena sasa teblemetsü khuret abentsü" ta ITLF-i tanü metetdaksü.

February 15, 2024 nikongdang atalokba lendongji pamoki memeteti atalok aser nübortemi iba ama tashiyim mapa meinyaksü ayongzüker ta ITLF-isa ashi.

"Tarutsü nung nisung shirnoki iba ama tashiyim mapa inyakdir pamoki teblemetsü khuret

abentsü" ta ITLF-isa metetdaksü. Churachandpur nung amenoka aliba Indigenous Tribal Leaders Forum (ITLF)-i district nung sorkar staff dang Hombarnü mapai maotsü tetuyuba agüja liasü. Manipur police ka mapa nungi anentsüba sülen ITLF-i iba tetuyuba agütsü.

Iba district ana nung Kuki nunger teimba lir.

Manipur head constable Siamlalpaul mapa nungi anentsüba meyipa agütsü aser Superintendent of Police Shivanand Surve o Deputy Commissioner Dharun Kumar na melentsü takhangba agüja ITLF-i sorkar mapa inyakerem dang Hombarnü nungi office-i maotsü tetuyuba agütsü.

Head constable Siamlalpaul-i village volunteers den külemi video ka agiba social media nung prokshiba sülen pa mapa nungi anenja lir.

Iba tetuyuba anema Manipur home department-ia "state sorkar office mesüra reju ajak nung authorised leave malii office-i marur dak No work-no pay tenzüksü" ta sangdonga liasü.

DC & DEO Kohima ajanga DLSC aser MCMC tentetogo

Dimapur, Tsüklai/February 19 (TYO): Deputy Commissioner aser District Election Officer, Kohima ajanga sangdong ka nung ashiba agi, 18th Lok Sabha atema General Election 2024 dak sendakba nung Model Code of Conduct atema District Level Standing Committee (DLSC) ka tentetogo.

Iba committee nung DC & DEO Kohima ya Convener asütsü aser Superintendent of Police, Kohima; EAC (Estt.) & Nodal Officer (MCC); All AROs Kohima district; Administrator KMC; EEM Nodal Officer; President & General Secretary of BJP/DCC/ NPP/NDPP/ NPF; President, Angami Public Organization; President, Angami Miapfu Mechu Krotho (AMK); President, Angami Youth Organisation aser Assistant Election Officer tem committee züngsem alitsü.

Lok Sabha election tajungtiba nung agitetsü asoshi iba committee ya mapang shia ajurutepa ken o balala jembitsü, ta sangdong ajanga ashi.

Commission ajanga election agütsü sangdongba anogo nungi

election maparen matem tashi political party, candidate, sorkar department aser nübortemi Model Code of Conduct sülen shidak anidaker asü masü ta iba Committee yagi repringtsü.

DC & DEO Kohima ajangasa ano sangdong ka nung ashiba agi, General Election to the 18th Lok Sabha, 2024 dak sendakba nung Media Certification and Monitoring Committee (MCMC) ka tentetogo.

Iba Committee nung DC & DEO Kohima ya Chairman asütsü, Kohima District kübok Assembly Segments ajanga nungi AROs; Asonuo, IIS, News Editor AIR Kohima aser DPRO Kohima nungertem züngsem asütsü, ta ashi.

MCMC yagi Kohima District atema candidates/political party tem indang advertisement atema certification agütsütsü aser c cable networks aser CD mesüra DVD nung record süa aliba densema print aser electronic media meita repringtsü, advertisements/paid news/ election dak sendakba ajak photocopy bendentsü, ta sangdong ajangasa ashi.

Nagaland Congress-i IT department anema lungkak ait

Dimapur, February 19, 2024 (Agencies): Nagaland Congress-i Hombarnü Purana Bazar, Dimapur nung aliba Income Tax office kima nung parnok indang national-level bank accounts shibangtsüba atema lungkak ait.

All India Congress Committee indang bank account aser All India Youth Congress indang bank account shibangtsüogo ta Nagaland Pradesh Congress Committee (NPCC) President S. Supongmeren Jamir-i ashi.

BJP-i Income Tax Department sasep nung ketdangsübaren nung teka ia Congress party bank account tem shibangtsü ta pai ashi.

Youth Congress ya nübortemeten aser teküpoktiba jenjang nung alir den tongteprateptsü atema inyakba telok ka lir. BJP-i indang tebilembaji Indian Youth Congress maparen nung tetsükdaksü ajurudaksütsü atema lir, ta Supongmeren-i ashi.

BJP sorkari democracy agiener aser Rashtriya Swayamsevak Sangh (RSS) maparen ajungkettsü atema

inyaker. RSS ya BJP indang telok lir aser parnoki Nagaland densema linük ajungalen Congress maparen azüoktsü meranger, ta paisa ashi.

Assam nung BJP sorkari nübortem agi tangar memeneper temetentem azüoker. Income Tax Department mapa ya ozüngi memelar aser Modi'er sorkari linük nung democracy ajembangtsü merangba nung shilem ka lir ta Supongmeren-i ashi.

Enforcement Directorate (ED) aser Income Tax Department-i BJP policy tem sülen manidaksüla aser democracy samaa odaktsüba nung shilem magütsü ayongzüker, ta NPCC President-isa metetdaksü.

Centre sorkari India-Myanmar artsülen Foreigners (Protected Areas) Order agienba ya magizüker. Congress sorkari taoba nung Look East policy mapa tenzük saka BJP-i Northeast renlokdaksür ta jembia iba tesem nung alirtem tsüngda telemsa adokdaksütsü aser balala kümdaktsütsü nükjiding nung inyaksangshir ta

Supongmeren-isa shisem.

Lok Sabha elections agütsü iba ishika dang lia iba inyakyim ya linük nung democracy azüoktsü atema inyaker, ta Nagaland Congress president S Supongmeren Jamir-i ashi.

"Parliamentary election agütsü mapang tonga arudang aser Prime Minister Narendra Modi aser par sorkari Congress aser INDIA bloc maparen atema tsübur" ta Supongmeren-i ashi.

Income Tax-i Rs 210 crore meshia Hokolbar Congress party indang main bank accounts shibangja liasü saka I-T appellate tribunal kati account lapoktsü mulungogo. Iba ken o ya taruba hopta angatsüba lir aser iba tashiji bank account meshibangtsü atema tribunal-i tetuyuba agütsüogo.

Congress-i democracy bener arutsü meranger saka BJP-i iba anema noktaker. BJP-i parnok tsürabur RSS ajanga linük nungi secularism agientsü meranger, ta NPCC president-i ashi.

Nagaland nung Lok Sabha elections atema Congress-i candidate ka yoktsü ta paisa ashi.

Northeast nung rü alatsü aser tzünglu arutsü

Dimapur, February 19, 2024 (TYO): Northeast India nung rü aser tzünglu kanga arutsü ta osang metetdaksüogo.

February 19 nungi 21 tashi Sikkim aser Arunachal Pradesh nung rü alatsü aser tzünglu

arutsü.

Sikkim aser Arunachal Pradesh nung dang masü saka February 20 nungi 23 tashi Northeast ajungalen tzünglu terara arutsü mesüra rü alatsü.

February 21 aser 22

anogotem Sikkim, Arunachal Pradesh, Assam, Meghalaya aser Nagaland nung tzünglu kanga arutsü aser rü kanga alatsü.

Iba ajanga tesem kar nung anentsüh, ajungben tzümetüng aser kiojentem raksatsü akok.

People's College Mokokchung campus tasenba lungzüng azüngogo



People's College Mokokchung Campus tasenba lungzüng Nagaland Information & Public Relation, Soil & Water Conservation Advisor Wb.Imkong L.Imchen-i azüngtsür kelen tangokba noksa nungji angur.

Mokokchung, February/ Tsüklai 19(TYO): Tanu Mokokchung nung People's College Mokokchung campus tasenba atema Nagaland Information & Public Relation, Soil & Water Conservation Advisor Wb.Imkong L.Imchen-i lungzüng azüngtsüogo.

Nübortemeten terenlok ta kodang teti ki-o-jen tajung yanglutetba, lenmang yangluba light bener aruba amalatem jembir saka chichiba terenlok ta kodang südir nübortemeten nung anitetba mapa inyakbaji lirta angateta iba People's College ya ozü kibongi bendanga anepalutsüta RD & SIRD Minister Metsübo Jamir-i tanu People's College Mokokchung campus tasenba

lungzüng azüngba sentong nung jembidang ashi.

Kü tsürabur N.I.Jamir-i nübortem anitetsü talisa Aor anitetsü mangdang akaba ama ozü kibongi Aor tejakleni odaktsütsü tamang nung küm ishika tejaklen school ka lapokogo aser tanu nungi tenzuka ano Private College nunga temelung bendanga agütsü tenzükerta Metsübo-isa lemsatop.

People's College Mokokchung management committee ajanga 2002 küm N.I.Jamir kibong nem iba college anepalutsü nungloksü aser tanu ozü kibongi joko iba college teti asoshi bendanga agia amshi tenzükba ya pongmang tuluka yur tenzük, anungji joko iba college ya tanga college-tem

dang nungi balaka tajung asütsü temelungtetba lir, iba college nung maka maitertema yaritsü aser ano koda masüba purtembo angatia züngdaksütsü tangatetba lir ta Metsübo Jamir-sa lemsatop.

1984 küm Mokokchung nübortemeten Mokokchung nung college ka akatsü nungtakerta angateta nübortemeten tenla agüja iba college ya nübortemeten ta asüba nungtem nung People's College aja, anungji iba college ya ozü kibongi anepaluaka ya nübortemeten ajanga asen nübortemeten lenmang papoka otettsü tamang nung yaritepdaktsünerta Metsübo Jamir-isa adenshia aliba purtem ayongzüka ashi.

(Maneni tapak 2 nung...)

Dimapur nung Congress teloki longkak ait



Dimapur, Tsüklai/February 19 (TYO): Central party indang bank account tem soitba anema linük ajunga nung longkak aitba nung shilem ka ama Nagaland Congress party-ia Hombarnü Dimapur nung aliba Income Tax office kima ola madoki longkak aita liasü.

Lok Sabha elections agitsü ita ishika lia linük nung

democracy ajemreptsü nükjidong nung iba mapa ya inyak, ta Nagaland Congress tir S Spongmeren Jamir-i ashi. Congress-i democracy tanaben benoktsü meranger, saka BJP-i kangasa anema nokdaker aser RSS inyakyim amenoktsü meranger ta ashi. "Party ajem-ajema malitsü saka constitution temenden asoshi maneni nokdaksü aser

nüburtem tenü nung maneni ola adoktsü," ta pai ashi. IT department ajanga bank account tem soita ayuba ya constitution den mapet lir ta pai ashi. Linük nung democracy kumzüka ayutsü mechi Nagaland nunga Lok Sabha elections atema candidate ka yoktsü, ta Spongmeren Jamir-i ashi.

DC Kohima ajanga traffic atema totuyuba kar agütsü

Dimapur, Tsüklai/February 19 (TYO): Deputy Commissioner, Kohima, Kumar Ramnikant-i two-wheeler taxis anena ayutsü aser city buses stops/pickup/drop-offs atema totuyuba ka agütsüo.

Nüburtem kumzüka alitsü aser yimti telungzüik nung traffic ketdangsüba tajungba kumdaktsütsü mechi iba totuyuba ya agütsü.

Two-wheeler Taxi atema High School Junction nung aliba parking ya L-Khel Building,

Peraciezie alema orr latettsüo. City bus Stops/Pickup/Drop-offs atema Secretariat leni aoba bus tem Vishal Mart kima alitsü saka mapang ka nung bus ana dang anena yutettsü. NPSC office leni aoba bus ya Nagaland Civil Secretariat main entrance matongdang anentsü saka mapang ka nung bus ka dang anentettsü. NPSC Office kima City Bus Parking atema Town leni tokoba bus tem opposite Nagaland Civil Secretariat Gate No.2 nung

anentsü saka mapang ka nung bus ana dang anena ayutsü. Town leni tokoba bus tem Axis Bank ATM kima, opposite Vishal Mart anentsü saka mapang kasa nung bus asem dang anentsü. Lenmang anatsülen gari anena ayutsü khenyongi memelar. City bus aser two-wheeler taxi temi iba totuyuba sülen anidaktsüla aser aibelener nem ozüing agi melaba ama temerenshi agütsütsü, ta sangdong ajanga ashi.

Thilixü Village Baptist Church küm 50 jungogo

Dimapur, Tsüklai/February 19 (TYO): Thilixü Village Baptist Church küm 50 ajungba Hon Jubilee benjongmung February 18, 2024 nü munga liasü. Iba sentong nung Minister, PHED and Cooperation, Government of Nagaland, Jacob Zhimomi-i adenba ajanga sentong tali meraketa liasü.

Iba sentong nung jembidang, pa iba benjongmung nung shilem agitetba asoshi kanga pelar aser

temoatsü angur, ta Minister Jacob Zhimomi-i ashi. Tsüingrem asenok den teti alir aser mezüingpuri metsü proka yutsüba tanü asenoki süngjang tajung aonger, ta ashi. Pai nüburtem dang Tsüingrem sülen maneni jajatsü aser iba Hon Jubilee ya tarutsü asoshi timla tajungba ayutsü temaitsü ka südakjang ta ayongzüik. Minister Zhimomi-i lanurtem dang meranga inyaktsü aser

tensa mapang melenshia aoba den lirumedema alitsü ayongzüka liasü. Tanü lima nung dangari metettsüa linüra mapa balala inyaktettsüla, ta pai ashi aser alima atema mapa tajung inyaktsü ayongzüik. Iba sentong nung Hon Jubilee indang nüngshilong ka Rev. Dr. Phugoto Sema, Executive Secretary, WSBK ajanga azüingja liasü.

Changtongya Town nung lenmang tasen ka semzük



Changtongya Town, Tsüklai/February 19 (TYO): Changtongya Town (Longpangtsung Ward & Sunrise Ward) nung February 19, 2024 anepdang 07:00 ako nung lenmang tasen ka semzüka liasü. Iba sentong ya NDPP 22nd Arkakong A/C office ajanga ketdangsüa liasü. Sentong nung Ward 2 nungi yimden, Tiasunep,

chairman, Changtongya Village Council, Alienba, President NDPP 22nd A/C aser senior party workers temi pelaba o shia shilem agia liasü. Sentong tembanga Tsüingrem O tatsüka lemsatepba iba lenmang ya bendanga agüja Rev. Temshi, Pastor CTBA ajanga sarasadem ayongzüka liasü.

Maneni sentong nung shilem agir ajaki dang menden nung meliaka NDPP CEC Member aser ex-MLA & Advisor, Imnatiba ajanga iba scheme ya (Improvement and construction of new circular road in changtongya town under SASCI) bener arua lenmang renemtsü nung tenüngsang agütsüa pelaba shisema liasü.

NLA atema osangbener dang metetdaksür

Dimapur, Tsüklai/February 19 (TYO): 14 buba Nagaland Legislative Assembly (NLA) indang February 26, 2024 nungi tenzüksü aliba Session abentsüpur ajunga dang pei tenüng aser danga details tem

agütsütsü metetdaksüo. Tenüng, gari number (car pass atema), contact number den Organization ID card tem iprnagaland@gmail.com dangi February 20, 2024 tashinung email asütsüla ta ashi.

Boiler Attendant tatidang atema form submission anogo atsülanger

Dimapur, Tsüklai/February 19 (TYO): Labour Department ajanga sangdong ka nung ashiba agi, Boiler Attendant Examination of II classes atema forms agütsütsü mapang February 29, 2024 tashi atsülanger.

Boilers Rules, 1996 nung shia aliba ama agitsü. Tatidang agitsü anogo aser tesem indang osang tejangja khen lir sangdongtsü. Taoba mapang sangdongba ama tanüngba ajak kasa alitsü, ta sangdong

Iba tatidang ya Nagaland

ajangasa ashi.

People's College Mokokchung... (TAPAK 1NUNGI...)

Nagaland Information & Public Relation, Soil & Water Conservation Advisor Wb.Imkong L.Imchen-ialakmeta jaoker o jembidang 1979 küm Ao Kaketshir Mungdang Golden Jubilee Longkhum yimtak amongba mapang Fazl Ali College nung tazüngertemji masemer anungji Mokokchung nung College ka lapoka aotsü pangzüng renem aser iba pangzüng dak ajemdaker maparen balala inyaktepa 1984 küm iba People's College lapoteta iba college nungi temeteter aika adokogota ashi.

Mongsenbai Ward Chairman Wb.Marnungsang tenati tayongzüka o tatsütsü jembiba den People's College Vice Principal Amongla Lkr-i tepela o jembi aser People's College Student's Union ajanga ken tajung ka aten aser senton People's College Principal Dr.T.Amongla ketdangsüba nung agi. Iba lungzüng meshiteta Kumlong Baptist Arogo Associate Pastor Dr.R.ZüLu Jamir-i sarasadem aser sentong nung Tsüingrem lenisüba atenba asoshi Tsüingrem nem tenüngsang agüja Ngati Baptist Arogo Pastor Sentiyaner-i sarasadem tembang.

Imkong L.Imchen-isa nüburtem tejakleni anir aotsü asoshi mangdang tulu yur College ka anepalu tenzükbaji nübur asoshi temoatsü tulu lir, anungji nüburtemi iba college nungittsüla aser nübur nungtak nungtak angateta Metsübo Jamir kibong iba mapa tajung inyakba asoshi tenüngsang agüja ashi.

Tanü iba sentong nung Nagaland Legislative Assembly Speaker Sharingain Longkumer, Advisor Tongpang Ozükum, Mokokchung DC Thsüvisie Phoji, Ao Senden, Watsü Mungdang, Mongsenbai Ward Yimden, Kosasanger Puso Ungma yimsüsür, All Ward Union aser nüburtem aika dena liasü.

Sentong nungsa Wb.Imtidongba Jamir,Aola,Tatar, Kosasanger Puso Ungma aser

Union aser nüburtem aika dena liasü.

JMC nung tailoring tenzüko



Dimapur, Tsüklai/February 19 (TYO): Jubilee Memorial College, Mokokchung nung February 19, 2024 nü professional skill on tailoring sentong ka All India Society for Electronics and Computer Technology (AISECT), Nagaland kübok tenzüka liasü. AISECT yagi tailoring aser electrician skills nung training agütsür.

Iba sentong nung JMC principal, Dr Imtiwati Jamir-i aben-süoshi artsü atema dangar dak metaloka melie sü arba yimya angazüka alitsü kanga tongtipang ta ashi. Toloto Awomi, Project Director ajanga tailoring sector nung teimla aliba indang lemsatep aser training agitsüpur ajungshia liasü.

Iba training ya shilem kar IDAN (Investments and Development Authority of Nagaland) ajanga senotsü agüja yarir.

Iba sentong ya Assistant Professor Tsungrosenla Jamir lenisüba kübok agi aser training agitsüpur aser AISECT züingsemtem dena liasü.

Iba training course agitsü

Centre-i aluyimertem dang nungi MSP nung pulse, mendi alitsü atema küm 5 sentong ka benok: Piyush Goyal



Union Minister; Arjun Munda, Piyush Goyal aser Punjab CM Bhagwant Mann nunger Chandigarh nung aluyimba lokti tentet lenirtem den sensaksemba mapang tangokba noksa nung angur.

New Delhi, Tsüklai/February 19 (Agencies): Union Ministers panel kati longkak aita aliba aluyimer lenirtem den Deobarnü Chandigarh nung ajurutepa sensaksemogo. Senden tembangba sülen Union Minister Piyush Goyal-i, Union Ministers aseme - Goyal den Agriculture and Farmer Welfare Minister Arjun Munda aser Minister of State for Home Affairs Nityanand Rai-aluyimertem ket nungi minimum support prices nung pulses, mendi aser kümba alitsü atema küm pongu asoshi sentong ka benokogo, ta ashi.

Kasa mapang nung aluyimer lenirtemi ashiba agi, parnoki sorkari benokba sentong sensak asemtsü aser anogo ana tsüingda telemtetba ka agitsü. Aluyimertemi temzüng ozüing kübok MSP dak sendakba nung guarantee agütsütsü aser iba den tanga onük kar khanga Punjab-Haryana arrtsü nung mongzüker longkak aita aliba mapang iba senden ya mena liasü. Punjab Chief Minister Bhagwant Mann-a iba senden nung dena liasü. Ghonda pezü tashi senden amenba sülen Goyal-i senden amenba mapang iba tasa ya

asateta liasü ta ashiba den, iba dak sendakba nung aluyimer lenirtemi telemtetba ka agitsü, ta shisem. "NCCF (National Cooperative Consumers Federation) aser NAFED (National Agricultural Cooperative Marketing Federation of India) amala Cooperative society temi küm pongu tsüingda MSP nung 'tur dal', 'urad dal', 'masoor dal' mesür mendi lu ayimertem ket nungi parnoki tsünütetba alizüktü atema tenangzüktepba yanglutsü," ta Goyal-i ashi. (Maneni tapak 8 nung...)

Menden lemdangba sülenang Rahul indang yatra nung adentsü: Akhilesh Yadav

New Delhi, Tsüklai/February 19 (Agencies): Samajwadi Party tekolakba Akhilesh Yadav-i Hombarnü ashiba agi, party ana tsüingda menden lemdangba sülenang parnok Rahul Gandhi-i aniba Bharat Nyay Yatra sentong nung adentsü. ANI den sensaksemba mapang Akhilesh Yadav-i ashiba agi, Samajwadi Party aser Congress na sensaksem tejakdangi odar aser party ana tsüingda Lok Sabha election atema menden lemdangtsü asoshi list lemsatepogo. "Sensaksem maneni kadar aser parnok ket nungi list aruogo aser onokia parnok nem list agütsüogo. Menden lemdangba sülen Samajwadi Party, Nyaya Yatra nung adentsü," ta Akhilesh Yadav-i ashi. Taoba mapang Yadav-i India Today TV den sensaksemba

mapang ashiba agi, Rahul Gandhi-i menden aser candidate kar dak temulung masür aser ibayongji menden lemdangtsü asoshi inyakyim menomeyanger. Akhilesh Yadav, Rahul Gandhi, Priyanka Gandhi, aser Mallikarjun Kharge nunger maneni sensaksem dar, saka tatembang ka metongteti lir. Kharge-i taoba mapang Amethi mesüra Raebareli nung Rahul Gandhi-i aniba yatra nung shilem agitsü atema Akhilesh Yadav jaoka liasü, aser Yadav-i pa jaokba agizüka liasü. 2019 küm election nung Samajwadi Party-i Amethi aser Raibareli menden atema metoktep aser parnok tang Congress den menden lemdangtsü asoshi atsütepdar. Taoba mapang Samajwadi Party-i, Uttar Pradesh nung

Lok Sabha menden 80 aliba nungi Congress nem menden 11 agütsütsü mulunga liasü. Tang SP-i menden ya 15 kümtsüogo, ta source balala ajanga metetdaksü. SP-i, Uttar Pradesh nung INC nem menden 15 dak tema magütsüner aser ashiba agi, Congress-i taruba Lok Sabha election nung Uttar Pradesh nung tanungba menden 65 nung metokteptetsü. Ajisüaka iba ya Congress-i magizükteti arudar. Samajwadi Party aser Congress na ya INDIA bloc nung partner lir. Party ana tsüingda menden lemdangtsü asoshi sensaksem takok ngua agitsü kanga tongtibang lir, kechiyong West Bengal Chief Minister Mamata Banerjee denbo sensaksem takok ngua magitet aser lai state nung la kija tokteptsü telemtetba agiogo.

PM Modi-i Mongolbarnü Jammu semdangtsü

New Delhi, Tsüklai/February 19 (Agencies): Ato Kilonser Narendra Modi-i, Mongolbarnü (February 20) Jammu semdangtsü, kong pai alima nung railway apu talangtiba densema project balala tenzüktütsü. PM-isa kasa anogo Jammu nung public rally ka nung shilem agitsü, ta Union Minister Jitendra Singh-i ashi. PM Modi-i tang agi tanabenbuba Jammu and Kashmir semdangtsü lir aser iba ya Lok Sabha matong tsüingda kanga tongtibang asütsü. PM-i Jammu mesemdang tsüingda security akangshiogo. Ketdangsurtemi drones, paraglider aser remote-controlled micro-light aircraft tem mamshitsü atema tenokdangba agütsüogo. Jammu indang District Magistrate, Sachin Kumar Vaishya-i section 144 of the Criminal Procedure Code kübok tetuyuba agütsüogo, kechiyong security dak sendakba nung mepetmesü adoktsü akok ta itangitertemi osang agütsüogo. PMO-i ashiba agi, Mongolbarnü 11:30 ako meta OM Modi-i Maulana Azad

Stadium, Jammu nung lokti senden ka agiba mapang sen crore 30,500 alang project balala atema nüngshilong azüngtsütsü. Project tem ya health, education, rail, road, aviation, petroleum, aser civic infrastructure amala sector balala atema asütsü. Sentong nungsa Ato Kilonseri Jammu and Kashmir nung tang sorkar mapa nung anioker nisung 1500 nem appointment order agütsütsü. Paise, 'Viksit Bharat Viksit Jammu' sentong kübok sorkar scheme balala beneficiary tem den sensak asemtsü, ta PMO-isa metetdaksü. Maneni PM Modi-i, sen crore 13,375 alang project tem lapokba linük nung bendanga agütsütsü aser ano iba den project balala atema nüngshilong azüngtsütsü. Ato Kilonseri All India Institute of Medical Sciences (AIIMS), Vijaypur (Samba), Jammu semzüktütsü. Iba institute atema nüngshilong ya Ato Kilonseri 2019 küm February ita azüngja liasü aser iba ya Central sector scheme Pradhan Mantri Swasthya Suraksha Yojana kübok amenokogo.




Congress lenir Rahul Gandhi aser pa pusemertem Pratapgarh district nung 'Bharat Jodo Nyay Yatra' sentong mapang tangokba noksa nung angur.

EAM Jaishankar-i EU Ambassador tem den sensaksem aka

New Delhi, Tsüklai/February 19 (Agencies): External Affairs Minister S Jaishankar-i Hombarnü EU ambassador tem den India-European Union tesendaktep aser regional aser alima ajunga indang ken o balala sensaksemogo. EAM Jaishankar-isa, parnok linük tem den India tesendaktep akangshitsü atema teyari agütsüba atema parnok dang kanga pelaba lemsatepa liasü. Paise, New Delhi tanü EU Ambassadors tem jaoka sensaksem tetba atema kanga pelaba lemsatep den pia parnok den Munich Security Conference indang lemsatepa liasü, ta ashi. "EU Ambassadors tem tanü New Delhi nung pelashishia host süogo aser @MunSecConf indang lemsatepogo. India aser parnok linüktem tesendaktep akangshitsü atema teyari agütsüba asoshi parnok dang kanga pelaba lemsatepogo. India-EU tesendaktep aser regional o alima tebilemstütem indang sensaksemogo," ta

Jaishankar-i X sabang ajanga metetdaksü. Taoba mapang Munich nung security conference agiba mapang Jaishankar-i EU foreign policy chief Josep Borrell den ajurutepogo. 60buba Munich Security Conference (MSC) ya February 16 nungi 18 tashi Hotel Bayerischer Hof, Munich nung agiogo. Kasa mapang nung New Delhi nung European Union (EU) aser India na February 21 nü security aser online disinformation aser information manipulation policy aspects dak sendakba nung sensaksem akatsü. EU aser India nungi mongin 35 dak tema New Delhi nung Bodhbarnü ajuruteptsü. Iba sensaksem ya Raisina Dialogue 2024 agiba mapang agitsü. Maneni EU aser India ya rongsenketzüng terenlok aser lenla balala nung tesendaktep tajung ayutsü atema mapang balala nung tenangzüktepba yanglushia arudar.



Delhi nung senden ka amenba mapang French Senate tir Gerard Larcher nem Vice President aser Rajya Sabha mendenbuba Jagdeep Dhankhar-i, lenirtem metetdaksüba noksa nung angur. Larcher ya tanga senator pongu-i meina liasü, shirnok France-India Friendship Group nung züngsem lir.



TIR YIMYIM YIMOBILEM (EDITORIAL)

DIMAPUR SANGTENNÜ, FEBRUARY (TSÜKLAI) 20, 2024

Lenir aika rongnung tai shimtet!

Linük nung Lok Sabha election agitsü asoshi anogo 100 shi dang lir, anungji külen BJP aser külen Congress teloki anir I.N.D.I.A telongjem purtem candidate shimba mapang lir. Ajisüaka, I.N.D.I.A telongjem nung shimba lenir Congress tir Mallikarjun Kharge-i BJP telok akoktsüsa sentong yanglua anir aoba mangur. Kharge ya ozüing metetba okatsür aser Congress telok nung lenir taintem rongnung ka lir, anungji pai züngashia metetba aser Congress nung taküm bendanga agüja tenzüka aruba apibo pa Congress tir inyaktsü langa lir. Ibaji dang masü saka pa ya linük nung teküpok jenjang nung alir Dalit kin nungi lir, iba jagi nübortem aika mulung akoktsü imlar. Ajisüaka, yimten telok anitsüba yabo züngashia metetba aser lokti nung temulung agüja tenzüka aruba kija agibo nunger moutetter, kechiyong lenir ka dakji lokti atsür aruba sempet alitsüla aser lanurtemi sapuba nisung ka asütsüla. Tanü iba sempetji Kharge aser Rahul Gandhi na dak mangur. Tenapronglaji ochishir, tenendak aser nübör meimba shisatsü aketba nisung asütsüa akok saka iba kisung jagi Narendra Modi koka masayatetsü. Atangji, Congress telok kijaibo BJP telok makoktsü ta angatetba agi Congress teloki anir BJP telok anemer regional party ajak agi 27 jadena parnok telongjem tenüngji Indian National Developmental Inclusive Alliance (INDIA) ta jajet. Iba telongjem nung Congress den tongtibang yimten teloktem Nitish Kumar-i aniba Janata Dal (United), Mamata Banerjee-i aniba Trinomol Congress aser Arvind Kejriwal-i aniba Aam Admi Party purtem liasü. Ajisüaka, tenzük metenzük ka Nitish Kumar-bo tanaben meyipa orr BJP teloki aniba NDA telongjem nung denogo. Ashiko, Nitish Kumar nükjidongji I.N.D.I.A telongjem tenüng nung pa ato kilonser (prime minister) asütsüsa tenüngtuteta shimdaksünüa asütsüa akok, saka Mamata Banerjee aser Arvind Kejriwal natiang Congress tir Kharge-ji I.N.D.I.A telongjem nung lenir asütsüla ta shidangba agi Nitish Kumar pongmang yangji atem südi. Tetezü, Nitish Kumar-i BJP telongjem toktsür I.N.D.I.A telongjem nung adenbaji BJP maginüba agi masü saka pa ato kilonser kümnüba agi lenmang ka bushidangba dang liasü ta angateter. Iba jagi Nitish Kumar akoksatsü asü, ajangzüksüar ajibo mapang agidang ashitsü, ajisüaka pa India ato kilonser akümtsüba lenmangbo mali kümogo. Atangji, I.N.D.I.A anitsü atema Congress tir shimbaji lenir aika rongnung nisung tai ka shim amai kümogo. Aji oda, Kharge-i wainshin meteta parnok telongjem nung adener shia nem yimten khuret agüja tangatettep nung inyaktsü asoshi luden balala shimteta inyakba mangur. Ano, külen Rahul Gandhi-i anir India tesem ajak sema jajaba yagi parnok I.N.D.I.A telongjem nung meputepbaang tali jangjar. Atangji, AAP aser Congress na Punjab nungbo tangatettep agi pei pei toktep tokteptsü bangjemogo. Kasaji, West Bengal nunga TMC teloka parnoka parnok kisung, shinga telok dena tangatettep meyanglu ser tokteptsü telemtetba agiogo. Ashiko, Delhi nungang Congress aser AAP na tangatettep nung tokteptsüa akok. Aji oda, Bihar nung Lalu Prasad Yadav telok RJD aser UP nung Akhilesh Yadav telok Samajwadi Party purtem den Congress teloki komaka longjem BJP den tokteptsü ta asübaji INDIA asoshi kanga tongtibang kümogo. Atangji, I.N.D.I.A nung adener yimten telok ajak dakji linük asoshi tajung inyaktsü tebilemba lir, saka parnok longjembaji linük asoshi mapa tajung ka inyaktsü nükjidong nung longjem masü saka BJP telok anemtsü asoshi longjemba dang lir. Iba jagibo nübortem mulongjang makoktsü aser parnok rongnunga aiben obang mapu adoktsü. Ashiko, I.N.D.I.A nung lenir ya Nitish Kumar sūdaksür, election sülen takok ngua government akümtsüka süra parnok telongjem kübok aliba yimten telok kobai menden teimba ngudir, iba telok nungi shimtsü ta tangatetba ka ayu nunga jungla. Iba amaji masüyonga, ato kilonser asütsü nisung shimtsüabajibo election sülen teloki mulungba ka shimdi ta tangatettep ken o ka ayuang I.N.D.I.A asoshi tajungba süla. Atangji, yimten nung tia melenteptsüabaji kecha meteta maka, anungji taruba anogo 50 tsüngda Congress teloki lenisüba shisatsü aser sentong tajung ka I.N.D.I.A asoshi sayutet nungbo BJP telok asoshi nükenbelemtsüka süla.

OLEMSABANG

Police ya tai maketer tashiyim agi merenshitsü ayuba asü...???

~ L. Kika Pongener.

29th January' 2024 anogo nung 'Anti Vehicle Thief Squad' (AVTS)-i Tetso College nung azünger kaketshir Mr. Moalong Jamir dak kecha küli maka tashiyim agi züka merenshiba otsü osang ngua nübortem kanga aoksar...!!! Iba amai kecha tajemtdak küli mekai, tai maketba kaketshir ka tashiyim agi pur züka merenshibaji, sorkar tashi ammer ngasangadema temzüng-ozüing dak alia tashi (Power) amshiba mapa ka sayur. Surabangla, 'Anti Vehicle Thief Squad' (AVTS) nem ya sorkar-i tai maketba nisung parnok mulongka agi, tapi-tapi agi pua arur tashiyim agi merenshitsüba tashi (Power) balaka agüja ali asü...???, ta nübortem mulongjang nung tasüngdangba aika arur. Sorkar-i mitkar (Police) ayuba ya nübortem kümzüksü aser temzüng-ozüing amshia nübortem azüoktsü ayuba asü (?) Mesura parnoki züka merenshirnur dakpo tapi-tapi agi pua arur merenshitsü atema ayu...???, Aji oda, Dimapur Police Commissionerate-i mapang shitak nung aibelener Police Personel-tem dak tapet mera agia merenshiogo...ta osang ngua kanga pelar aser tenungsang agütsür. Ajisüaka, kanga junga shisadangra, tai maketba kaketshir ka arishi tepiyong atema taküm telemta (Invalid) kümdaktsüabaji, parnok mapa nung 'Suspend' sutsüba, mesura anentsüba jagi pa temang shi (Physical body) nung teti atema tarak ketdaktsüabaji akhi ama meyipa mekümdaktsütettsü.

Social Media nung anguba agi, Mr. Moalong Jamir abelen tenarong (Ear Drum) raksatsü, tezüngjang (Kidney) ka wakdaktsü aser tongtoret (Back bone) raksatsüba, osang angudang kangasa sasa-a bilemetsüogo. Aji oda, kecha tai maketba asangur taküm ka, Police Personel kar pei nem nungloktsüba tashi dak alia, talila tashi amshia, tim mesui inyakba agi, arishi tepiyong asoshi taküm telemta (Invalid) kümdaktsüabaji kangasa tejashitsüka lir. Iba ama tashiyim mapa inyaka nisung ka taküm lemtatsüabaji, parnok mapa nungi anentsüba aser merenshiba kisung jagipo temulung masür. Aji oda, temang nung tarak keta raksatsüabaji anepalua yaritsü (Medical treatment) asoshi sorkar-i akokba lenmang (Financial Help) ajak agi yaritsüla. Anungji tarutsü nung tai maketba nisung dak iba ama tatalokba ya mesuka mataloktsü aser meinyaktsü asoshi sorkar-ia mitkartem (Police) atema temzüng-ozüing tesashi kar yanglua azüoka meyura, mapang shia tang atalokba amai tai maketba nisung pua züka reshikangshitsü. Police-tem atema dang masü, saka asen lima nung aliba Melitary Personel-tem atema-a tekümdangtsü aika dang lir amai bilemer. Küm ishika tejaklen, Mon District nung tai maketba nisung, aayanger kar mapa temer kidangi meyipa shilangdang, kecha küli mekai Melitary Personel-temi lenmang nung 'Ambush' sua ata-a lir, tapayutsü nisung taküm aika khasetba to-a kangasa meshisadangi taochi maket inyakba mapa ka liasü.

Ano tang atalokba amai kecha küli maka sur, tai maketba nisung ka dak tashiyim amshia züka merenshia, taküm ka arishi tepiyong asoshi taküm telemta (Invalid) kümdaktsür alinung, sorkar Department nung tazünpur/tulurtemi pei küpok tenzüker aibelenertem dang tim tarutsütsü arja aitsütsü melena, parnok poküma (Support) sua jembira/inyakra, idangji nübortem züpo (Scar) tajem nung metsü (Salt) shioktsü amai kangasa shishia aser arok-aroka jashidaktsür. Aser sorkar Department nung tazünpur/tulurtemi iba amaji aibelener poküma jembira aser inyakra, idangji nübortem mulongjang nung...Surabang iba ama tashiyim inyakba mapa ya sorkar-i ajungoktsür inyakdaktsüba mapa ka asü (?) ta temulung melemi bilemdaktsür aser nübortem temulongjang nung tasüngdangba aika arur. Anungji sorkar Department nung tazünpur/tulurtem-ia pei küpok tenzüker asüyongjia, aibelener dangpo aibelenogo ta indang-indanga shitettsüla aser tajunger dang tajunga ta shitetba shisatsü alitsüla. Aji oda, sorkar Department nung tazünpur/tulurtemi pei küpok tenzükertemi aibeleno inyakdang parnok poküma jembira aser inyakra, tarutsü nung tangar tanungba tenzükertema tan-masütsü aser ano-sa temulung ulua tashiyim mapaji inyaktsü. Anungji aibeleno inyaker dangpo aibelenogo... ta indang-indanga ashitsüla aser mapa dak alang tapet temerenshi agütsüla.

Ano mitkar (Police Personel) tem-ia kanga junga angatettsüba kaji...Sorkar-i itasen dalang agütsür, uniform tajung semdaktsür, hadir (Arms and ammunition) agütsür, temzüng-ozüing shitak amshia nisung tamajunger, ozüing alema inyakerem, küli tejangja alinungdang pua arur tapet temerenshi agütsütsüba dak alaka, tapi-tapi agi 'Küshi-Küshi' tai maketba nisung züka memerenshitsüla. Sorkar-i nungloktsüba tim teinyaktsü tashi dak alia, talila tashi (Power) mamshitsüla. Sorkar temzüng-ozüngji asen amshinulen amshitsüba temzüng-ozüing ka, aser sorkar-i agütsüba hadir-ji tai maketer dak akhatsü aser yirutsütsüba agütsüba masü...ta angateta kanga kümdanga azüoka amshitsüla. Tanubo aseni aibelenba atema sorkar temzüng-ozüing nung keta aliba tapet temerenshi angur, saka ano pei chirnur aser semchi-semnur dak kechi ataloktsü aseni kecha meteta mali. Anungji, aseni inyakba mapaji asen dangi meyipa marutsüsa, kanga kümdanga inyaktsü, tang atalokba mapa ya ajanga lesson tajung agitsü mitkartem ajak dang ajungshir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Mokokchung, February/Tsüklai 19 (TYO): Longkong Baptist Arogo nung Rev. Supongwati ajanga August 22, 1926 nü parnok tenet baptija Longmisa Baptist Arogo tenzüker 2026 küm Longmisa Baptist Arogo centenary nükla nung tesendaktep akangshiba omen dak ajemdaker February 18, 2024 nü Longmisa Baptist Arogo ajanga Longkong Baptist Arogo semdanga tesüiba anogotem bilemteta Tsüngrem nem tenüngsang agüja kati ka asoshi temoatsü meshia sarasadema monga liasü. Iba anogo Arogo ana sannüker aser tenzükerkem külemi tangokba noksa nungji angur.

Singapore nung putu aika tejen Khristan otsü ngutet

Singapore, Tsüklai/February 19 (Agencies): Singapore nung akhi mapang Khristanpur aliba indang otsü kar küm noklang ka tain time capsule nung ngutet, ta osang ajanga ashir.

Chinese Methodist Church nungi iba time capsule ya ajanga 1924 aser tejakdang Khristanpur takum indang sayyr, ta Channel News Asia (CNA) ajanga February 19, 2024 nü ashi.

Iba capsule aser artefacts yagu Singapore nung Methodist Church indang puti otsü nenshia sayur, ta Singapore nung aliba Methodist Church indang tir Gregory Goh-i mungdang ka nung ashi.

"Yangji iba mapang arogo ka indang takum ajunga sayur aser tamangertemi yimsü amshiba indang ashir," ta Goh-i ashi.

"Parnoki atenba ken asenoki meteter. Anungji ibai jangratemtsüka lir aser iba ya ajanga asen yimsü maneni mesamadaktsüi amshiba nung yarir," ta pai ashi.

Iba metallic box ya Telok

Ayer nung 1925 küm yangluba Methodist Church indang jara agi nembanga liasü. Iba tekülem ki ya 1989 küm national monument ta sangdong.

Iba metal box nungya artefacts ter shi liasü aser yangji 1919 pocket-sized hymn book aser osang kaket aser danga oset kar liasü, ta CNA ajanga ashi.

Iba ken kaket nungya arogo nung tekelem agiba indang tejangja liasü, kong Holy Eucharist, kiyomba, asüpila sentong amala deena lir, ta ashi.

Iba box ya tekülem ki jara nungi February 7 nü agitet aser tesem takok ka nung mapang tatsüka yur February 14 nü lapok.

1942 nungi 1945 tashi Japanese Occupation mapang iba tekülem kidang nisung 300 shi jenoka liasü.

Time capsule aliba ya arogopuri meteta liasü saka shingai agitettsü memerang, ta CNA ajanga ashi.

Iba arogo küm 100 ajungba benjongsü aoshi arogo indang committee kati arogo dak sendakba otsü bushiba mapang

The Malayan Saturday Post nung iba time capsule indang article tejen ka züngshi.

Iba article nungya tekülem ki yanglutsü asoshi nungshilong azüngba aser time capsule yua aliba tesem indang tejangja nguteta iba metallic box ya bushia agitet.

Telok Ayer nung aliba Chinese Methodist Church ya Benjamin West mapang tenzüka lir. Benjamin West ya American medical practitioner aser Methodist missionary ka liasü. Upper Nankin Street nung para ki ka nungi West-i shirangertem anepalua osangtajung prokshia liasü. Singapore nung Methodist Church mezüngbuba ya 1885 nung amenok aser tangbo arogo 46 shi lir aser züngsem 42,000 shi lir ta ashir.

Nisung million 5.7 shi aliba Singapore nung kin aser tamangba yimsü balala lir. Ethnic Chinese nungerya timba Buddhists aser Malays nungger timba Muslim nungger lir. Singapore nung Khristanpur ya shilem 15 shi lir.

ANOGO ABEN TSÜNGREM DEN

Tsüngrem den ajurutepba

Saka Aramesoang, aser noktakang kechiaser kechi otem nungsa nai ni nguogo aser kechi otem nungsa ni ne dangi adoktsü, item indangji na tenzüker ka aser kuli agütsür ka asütsü shimtettsü asoshi ni ne madangi adokogo.

T. Mapa 26:16

Na Tsüngrem den mapa inyaksü metenzükdang tama Tsüngremi ne taküm nung mapa inyaker aser ne taküm nung kechi mapa inyaksü Pai metet (Yr. 1:5; T.Ken 139:13). Damaska among nung Paul temulung memeyip dang, Yisui Paul temulung memeyip dang Yisui Paul metetta liasü aser pa asoshi tejangja mapa ka yuja liasü. Saka iba mapa Paul temulung meyiper külen dang Yisui jungkai adoktsü (T.M. 9:15).

Pauli Tsüngrem nendaka tenzüksü tejangraba liasü saka pa tejangraba mashilen amshi. Tsüngrem nendaka tenzüksü merangdang pai Khristantem den raratep! Tsüngremi Paul asoshi kechi aginer metetta liaka pai pa Kibuba meyong mekümdaktsür tashi Tsüngremi ataa ali.

Asenoki Kibuba asoshi kechi inyaker aji metettsü asoshi Pa asenok dangi marur. Pai Pa mapa metetdaktsütsü asoshi aser ajatsü asoshi Pai asenok den ajuruteper. Tsüngrem den ajurutepba nung Tsüngrem mapa kechi jungkai adoker iba den asenok sasa sütepa alitsü nungdaker. Tsüngremi asenok dang anogo ka asoshi dang bendanga agüja bilemetsü kodanga tesendaktep meyanglur. Pai asenoki Laishiba metetba nung renloktsü atema dangbo mejembir. Item ajakji atena oa tongtipang mapatem asen Kibubai jungkai adoktsütsü renema lir! Kodang Tsüngremi Pai inyakba asenok dang jungkai sayudir, Pai inyakba mapa nung asenoka atentsü Pai ajar.

Tanü na Tsüngrem den ajuruteptsü renema lir asü? Pauli asüngdangba ama, "Kibuba, ni kechi inyaksü?" ta asüngdangtsü renema mali tashi Tsüngremi jembiba angashitsü tebushi.

Pakistan nung tamanger ka ken o tai nung pua aliba chiok

Lahore, Tsüklai/February 19 (Agencies): Pakistan nung ken o benoker kati kuli tiazü agüja tai tongloktsü ta nangzüka sülen arishi küm 72 tain Khristan ka tamangba yimsü mezüngmeshiba ken o nungi chiokogo.

Punjab province kübok Jaranwala Tehsil, Faisalabad District nung village 211-RB nung alir Younis Bhatti shiba dang Bhagat ta ajar, pa ya Quran shisatsüba ken o nung Pakistan indang blasphemy statutes indang Section 295-B kübok February 10 nü pua liasü, aser iba ken o nung aitsür ya ajak takum tepiyong tepuokdak ayur.

Bhatti'er kibongi tenzüka Brethren house church nung züngsem Sosan Fatima-i pa dak tai tongloktsüba nung, la Quran zünga lia pa aita merenshi aser Islamic scripture ya shisatsü ta shia liasü. Lar kinunger Islam dangi meyipba Bhatti-i anema nokdak, ta Fatima-isa ashi.

Bhatti-i par li nung Fatima nem angati ki ka agütsü aser iba ki ya pai ano Khristan kibong ka den lemdangtsütsü sentong aliba

nung lai anema nokdak. Bhatti-i ashiba agi, police temi pa indang kuli angaba sülen tasüng aonung Fatima aser la kinungbo police station-i anir arua pa lia asüngdangya asü. Anasa aliba Khristanpuri kuli agütsüba police temi bendentsü merang ta pai ashi.

"Mapang tatsüka lir Fatima ajep tenzüker aser lai tiazü nung kü dak tai tongloktsü ta nangzüka. La kinungbo aser danga Khristanpur anati anogo ter tejakdang ki lemdangtsüba anendaktsütsü mechi tasa yanglu ta lai ashi," ta Bhatti-i Christian Daily International-Morning Star News dang ashi.

Police temi First Information Report (FIR) nungi kü indang tenüng agientsütsü ta ashi saka lendong aliba mechi ni idangjisa mechioktet, ta Bhatti-i ashi.

Tamangba yimsü mezüngmeshiba osang temai adokba sülen mosque indang loudspeaker nungi sangdong agüja Muslim nungger 500 dak tema longkak aittsü adenshi aser iba yongji yangji alir Khristanpur

aika pei ki yutsür jena ao.

"Iba lendong tulu nungi kumzüka atema ni Tsüngrem nem tenüngsang agütsür. Tiazü ken o nung ni aitsütsü merangertem ang kasa ken o nung shiogo. Nai Tsüngrem dak bendanga amangra Pai mapa yamai inyaksü," ta Bhatti-i ashi.

Khristanpuri yariba atema pai pelaba lemsatapa liasü.

Fatima-i Khurrianwala Police dang ashiba agi, la aser la kinungbo Samuel Masih, alias Amanat Ali na küm ka tejakdang Islamdangi meyip. Younis Bhatti-i ashiba agi pai Khrista dak tamang akaba ajanga iba ken o nung tasü ita nokdaket.

"Fatima-i tai tongloktsüba ya khenyongi tamendak dak maka. Ki lemdangtsü asoshi jembishinütsü atema lar kidangi iba anogo ni ao saka ki telungi mai," ta Bhatti-i Morning Star News dang ashi.

"Iba mapang la kinungbo kidang meliasü aser kidanger temi la kinungbo malidang la den mejembitsü ashi."

Parnoki ashiba anga pa

medemar ka ajurutsü asoshi anasa aliba yimsüng kati ao.

"Ni lar kidang nungi ayazükba sülen ni Quran raksatsü ta Fatima-i tiazü nung tai tongloktsüogo ta nisung kari phone ajanga küdang ashiba sülen ang ni metet," ta Bhatti-i ashi.

Tamangba yimsü mezüngmeshiba anema longkak aittsü atema adenshiang ta mosque loudspeakers nungi Muslimnunger dang sangdongba sülen Khristanpur ajak jena ogo ta phone ajanga pa dang ashi.

"Ni teti kü temulung ajak agi Tsüngrem dak tamang akar aser Pai ni kodanga metoktsütsü ta ni meteta lir. Iba tamang ajanga ni jena aotsü melen ozü yimdaki aotsü ajungmeso. Ni ozü yim atongdang Muslim nungger 500-600 shi adenshia ni anema yimyim ayima liasü," ta Bhatti-i ashi.

Pa dak menungnangi azüktsü akok ta tetsübo nung pa atsük.

"Ni atsüka lia temulungjang ajak agi maneni sarasadem. Police aruba sülen ni parnok alidaki asema ao aser kü tenüng ashi aser

kü sasa bendanga agütsür ta ashi."

Pa anema FIR benokba police temi zünga ashiba mapang Fatima yimsü melenba indang pai metet. Ni parnok dang ni tai maket aser tenük kuli agütsütsüpura lir ta ni police dang ashi.

Bhatti nem legal aid agütsüba Christians True Spirit (CTS) tekolakba Asher Sarfaraz-i anogo ana tsüngta Bhatti chiokba ya tesüngmangtsüka lir, ta ashi.

"Iba ken o tamajung nungi kanga kera temeden anguba ya kodanga majangshidang. Police temi ochishia ken o bushisüngdangba atema tenüngsang agütsür. Bhatti par kinunger den tanaben ajuruogo, saka par kidangi tanaben meyipa aotsübo majungtsü," ta Asher Sarfaraz-i ashi.

Pakistan nung tamangba yimsü mezüngmeshi ta temulung meleme alirtem ken o jembiba metembang tashi police ket nungi mechioker aser Islam tesayur Muhammad mezüngmeshi nem tasüba temerenshi agütsür.

AO OSHI ANGAZÜKDAK: TANÜ ANGAZÜKTSÜBA OJANG



Sokscü

(n) arem nung senzüdang memeteti teshinem rüsaba (putrid smell in the forest)

* Sokscü rüsanübo mapa ajak nung tazüya atener.

Sokuyi

(n) tebur sobaliba sübutsü ka, sü nung rong enoka yanglur abelen tapu nungi sangzüka alua achijilen mesülöker. (a traditional man's dress)

* Sokuyi ya arürleperi agiba sobaliba sübutsü ka lir.

OLONG PAITEP # 6703

Grid for crossword puzzle #6703 with numbers 1-19.

TIPIEN

- 2. Teburtemi tejak nung awaba - (8)
6. T ___ em - (3)
8. Tzüik ayudak - (3)
9. Nüngdakba dang timba - (6)
11. Züina ao - (4)
12. Yangi tzü angur - (5)
14. Tangar dang nungi tali - (4)
16. Senyong masü - (6)
17. Oadokdi - (3)
18. Tzü tarok - (3)
19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
3. Nisung ka mapa inyaksü nübo - (4)
4. Azüntsü asoshi mejemba - (6)
5. Tesangwa agütsüba - (5)
7. Tila masü - (4)
10. Tebenjem tetsür chanu - (4)
11. Tekolak nung inok - (4)
12. Tetsüngda - (6)
13. Tangar inyakba ka inyak - (6)
14. Tim masü ta ashi - (5)
15. Asalendong - (4)
16. Tanü dangtsü - (4)

OLONG PAITEP # 6702 TELANGZÜBA

TIPIEN :

- 1. Telok, 4. Aluru, 6. Ozüng, 8. Emk, 9. Kin, 10. Teti, 12. Süir, 13. Jen, 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kiochtsü, 5. Lenti, 7. Tajangzüik, 11. Teronem, 12. Sempa, 13. Jahaz.

NAI-A YA METETTER MA



Reserve Bank of India (RBI)-i taküm January ita Paytm Payments Bank shibangtsü tetuyuba agütsüogo aser iba jagi March 15, 2024 sülen Paytm FASTag recharge mesütettsü. March 15, 2024 sülen Paytm Payments Bank customer accounts nung top up, prepaid instruments, wallets, FASTags, National Common Mobility Cards amala nung sen meinoktettsü mesüra credit transactions mesütettsü mesüra top up meinoktettsü. Paytm FASTags tamshidakpurtem ajaki account nung aliba balance ajanga tolls sen agütsütettsü saka iba ya March 15 tashi dang melatsü.

Paytm FASTag shibangtsü inakyim:

- 1. 1800-120-4210 nung dial asüba sülen registered mobile number aser Vehicle Registration Number (VRN) mesüra Tag ID agütsütsü.
2. Iba sülen Paytm customer support agent kati nü indang FASTag shibangtsü osang sangoktsütsü.

ULFA-I-i itdangiter Manash Borgohain temerenshi ajemtsür

Guwahati, February 19, 2024 (Agencies): Assam Police atema itdangiter Manash Borgohain nem tasüba temerenshi agütsütsü lemtet agiener ta February 19 nü United Liberation Front of Asom - Independent (ULFA-I)-i metetdaksü.

Manas Borgohain ya 2021 nungi Assam Police nung Special Branch Sub-Inspector inyaka arur. Iba tasa nung Director General of Police GP Singh aser Deputy Inspector General Partha Sarathi Mahanta na dena lir" ta ULFA-I-i ashi.

Ozüng alema inyaksangshir aser Special Branch Zonal Officer Manas Chaliha-i yaküm

June ita nungi lisopur lanur aika operation atema training agiba osang metetdakja liasü, ta ULFA-isa ashi.

Royal Enclave Apartments, Ajanta Road, Beltola, Guwahati nung No. 401, 409 aser 207 nung training agi. Iba sülen Lower Council nung President menden ser February 13, 2024 nü trial ka agi. Iba mapang bushisüngdangba report aser chargesheet repringdang aser tai tonglokja aliri aibelenba nangzüik. Pai ronsen aser tashi aginüba, teinyaksü mapa tangatetba anema inyakba aser ULFA anema inyaksangshiba pai nangzüik, ta ULFA-isa metetdaksü.

ULFA-i küm pezü atema Manash Borgohain züngsem züngdokogo, küm ka mapa inyaksü (physical labor) aser yimya tajung amshia küm pezü self-correction asütsü tetuyuba agütsüogo.

Senior Commission Officers aseme tentetba Monitoring and Review Committee kati iba maparen ketdangsüa repringtsü. Iba mapang tsüngda Code of Conduct sülen anidaksüla aser pai tatembangba maongka agütsüba ama meliteta 'United Liberation Forces, Assam [Independent]'-i tebilemstü khuret kecha mabentsü ta parnokisa ashi.

Tripura CM-i PM Modi dang Rs 20 crore grant atema pelar

Agartala, February 19, 2024 (Agencies): Prime Minister Narendra Modi aser Union Education Minister Dharmendra Pradhan nati MBB University nung infrastructure renloksü Rs 20 crore lezmüktsüba atema kanga pelar ta Tripura Chief Minister Manik Saha-i ashi.

Prime Minister Uchahatar Siksha Abhiyan (PM-USHA) nung shilem ka ama Union Ministry of Education-i senotsü agütsütsü mulung. PM-USHA ya

MBB University dena linük nung university 78 nung infrastructure tajungba kümdaksütsü atema lir.

PM Modi aser Education Minister Pradhan nati grant agütsüba atema pelar, ta Chief Minister Saha-i ashi.

MBB University ya 2016-17 academic session nungi tenzüik aser postgraduate 5 aser integrated master's degree programs 2 agütsür.

PM Modi aser Union Urban

Development Minister Singh Puri nati Tripura nung urban development asoshi Rs 419 crore lezmüktsüba atema pelar ta Chief Minister Saha-isa ashi.

India sorkari 2023-24 atema Special Assistance to Capital Incentives (Urban planning reforms) kübok sen lezmüktsüogo. Iba atema Hombarnü mezüngbuba installment Rs 83.80 crore agütsü.

Assam sorkari Mar 1-10 tashi Vikas Yatra agitsü

Guwahati, February 19, 2024 (Agencies): Assam sorkari Vikas Yatra ka agitsü sentong lir aser anogo 10 nü sentong nung Rs 25,000 crore alang mapatongtem tenzüksütsü.

March 1 nungi 10, 2024 tashi Yatra nung Chief Minister Himanta Biswa Sarma aser tanga cabinet minister temi shilem agitsü.

Vikas Yatra nung Rs 25,311.01 crore endoka yangluba mapatong 3,290 dena lir ta sorkari ashi.

"Yatra mapang mapatong 1,789 indang lungtem azüngtsü aser itemji Rs 17,004.24 crore endoka yanglutsü. Maneni Rs 5,407.38 crore endoka yangluba mapatong 1,513 tashi lapoktsütsü" ta CM Sarma-i

Maneni, general areas nung Rs 2,309.83 crore endoka school 330 lapoktsü aser Rs 306.06 crore endoka tea garden areas nung school 99 lapoktsü, ta CM Sarma-isa metetdaksü. Talisa, Rs 283.50 crore endoka Jagannath Community Centres 189 yanglutsü, ta paisa shisem.

Arunachal Pradesh nung nakmati atur 3 nungi 2 chiokogo

Itanagar, February 19, 2024 (Agencies): Arunachal Pradesh kübok Phinbiro nung Deobarnü nakmati atur nisung asem pura oba sülen anabo Hombarnü chiokogo.

Nakmati aturtem ya

Changlang district kübok Lyngok Longtoi circle nungi sama aser telungpur telok kari pur ao ama temulung meleme bilemer.

Yashi pur aoer rongnungi Gyan Thapa aser Lekhak Bora na arem nung angu saka tasembuba

Chandan Narzary mangu bushitepdar.

Par asemprong ya Sibu Sarkar aser Ranjit Thapa na meyong nakmati aturtem lir aser Deobarnü nungi Arunachal Police-i par asem bushiteptsü tenzüka liasü.



2024 state assembly election agitsü jakdang Sikkim Chief Minister Prem Singh Tamang-i Lhatsun Chenpo Centre atema lung azüngtsüogo. Singtam Khamdong constituency kübok Simik Lingzey nung iba Centre yanglutsü. Tanü 12th Chamgon Kenting Tai Situ Rinpoche aser 10th Kyabje Tinkey Gonjang Rinpoche na lia CM Tamang-i lung azüngtsüogo. Rural Development and Ecclesiastical Department Minister Sonam Lama-i Sikkim nung Lhatsun Chenpo kürakyanglu ya kanga tongtipang aser nüngdak lir aser Chief Minister Prem Singh Tamang lenisüba kübok iba mapa ya inyaker ta ashi. Paisa Gyalwa Lhatsun Chenpo project, Phuntsog Namgyal project aser tanga yimtsüng ka nung project ka inyaksü osang metetdaksü. (Gangtok, February 19)

IMPACT HUB INSTITUTE FOR COMPETITIVE EXAMS
ADMISSION OPEN / CRASH COURSE 2024
NEET | JEE | NSEE | CUET | NERIST

Hostel available for Boys & Girls
7005651736 | 7005657885
 Opp. Office of the Commissioner of Police, Dimapur

ACKNOWLEDGEMENT

LATE. MAPUWATI AIER
Oct. 7, 1943 - Feb. 7, 2024

*For this is God, Our God forever and ever;
 He will be our guide Even to death.*
Psalms 48:14

"There's a special kind of feeling when we think about you. Aba, it's a pleasure to remember all the happy times we've had. There's a special kind of caring that is meant for you alone, there's a place somewhere within our hearts that only you can own."
 Our sincere gratitude to Mopungchuket Senso Telongjem Kohima, Neighbours, Friends and well wishers who stood by us Spiritually, Physically and Financially during his illness and death.

- Loving Family members near and far.

US-i Houthi telok indang hadir pongu raksatsü
Washington, Tsüklai/February 19 (Agencies): Temerem tzüyim nung mangatettep tali kuma aoba mapang ka nung United States-i Deobarnü Yemen nung Houthi telok indang hadir tapu balala pongu raksatsüogo, ta US Central Command (CENTCOM)-i ashi.

CENTCOM-i ashiba agi, parnoki mobile anti-ship cruise missiles asem, unmanned surface vessel ka aser unmanned underwater vessel (UUV) ka ta Honibarnü maka liasü.

US-i ashiba agi, Houthi pur indang rong ya US Navy rongtem atema lendong lir aser iba jenjang agiba ajanga iba tesem nung sadem sadema senzisenpongtsü atema temeden aliba kümzüka toktsütsü.

Temetetsü kaji, taoba küm October ita nungi rara tenzüka sülen tang mezüngbuba Houthi puri unmanned underwater vessel amshiba indang osang metetdaksüogo.

Ajisüaka ken o dak sendakba nung Iran den sendaktepa aliba Houthi telok yagi kecha osang magütsü.

Houthi teloki taoba küm November ita nungi shishilembadang amshiba rong aser military rongtem amak tenzüka sülen iba tesem nung tensa mejungi aliba mapang ka nung tang US-i iba jenjang agiogo.

Houthi puri mezüngbo parnoki Gaza nung Palestine nung pusema Israel den sendaktepa aliba rongtem amaktsü ta ashi, saka iba sülen parnoki United Kingdom aser US den sendaktepa aliba rongtem dena amak tenzüik.

Kasa mapang nung US aser UK natia meyiper Yemen nung Houthi pur aiben makogo aser ashiba agi, Houthi puri rong balala amakba ajanga alima nung shishilemba amokmerener.

Honibarnü Houthi puri British oil tanker ka amakba osang sangdongogo. US-i ashiba agi, iba rong ya Panama wako songer aliba rong ka liasü aser India-i totzü bener oya aliba mapang amak.

Temerem tzüyim nung mepetmesü adoker aliba ajanga rong achaayangba company temi lenmang talangba amshia Africa meketa senzü tenzükogo. Iba ajanga jenjang tali kümogo aser alima ajanga rongsenketzüng nung kongshitsü ta tsübuja bilemer. Kasa mapang nung iba mepetmesü ajanga Egypt-a kanga akoksadar, kechiyong Suez Canal amshiba ajanga taa ngua aliba kanga tajemba kümogo.

Pelaba Lemsateper

ASO: 14.04.1962 **ASÜ: 10.02.2024**

Onoki teti meima aliba asür **Moanüngsang** (Longmisa) shiranga aliba mapang nungi tasü nü tashi shirnokisa tamang sarasadem den rongsen aser nebo agi yariogo, nenok ajak dang onoki kanga pelaba metetdaksür. Tsüngremi nenok temeim mapa asoshi ano tali moajangma.

- Temeim Kinungtsü, Jabaso, Kinunger & Anükapang.

OFFICE OF THE VILLAGE COUNCIL, CHANGKI
MOKOKCHUNG: NAGALAND

ORJA SANGDONGER

Changki lushi nung arem shiruru aser ozü sangnü akatsü kenyongi memelar, mesüra arem-ayong nung yatatsü memelar ta metetdaksür. Ozüng raksartem putetra, temerenshi tulu alitsü ta Changki Council-i ajak dang sangdonger.

Sd/- Lendimenba Amri
 Chairman, VCC

Sd/- Imilitenzuk Changkiri
 Secretary, VCC

Papua New Guinea nung kin o kin tsüngda raratep; nisung 64 asü



Port Moresby, Tsüklai/February 19 (Agencies): Papua New Guinea anütoktiplen kin o kin tsüngda mangatettep adokba sülen nisung 64 tepsetogo. Osang balala ajanga, tawa

Wapenamanda District nung Deobarnü anepdang züngia lia raratep tenzüka liasü.

Iba mangatettep nung Ambulin aser Sikin kin aser parnok den sendaktepa aliba kintem densema liasü, ta kasa sangdong ajanga metetdaksü.

Police-i Post-Courier dang ashiba agi, parnoki Wapenamanda kübok lenmang tezülen, aser tenem nung Hombar anepdang tasü mang 64 nguteta liasü.

Telok balala yagi rara nung AK47 aser M4 amala prangbong tesashi amshia liasü, ta osang kakat ajangasa metetdaksü. Lendong nung asürtem ya ano timba akümksü imlar, ta parnokisa

metetdaksü.

Australian Broadcasting Corporation (ABC)-i ashiba agi, taoba küm Enga Province nung kasa kintem tsüngda mangatettep adoka liasü aser iba mapang nisung 60 tashi tepseta liasü.

"Papua New Guinea kübok Enga aser Highlands ajunga nung tang nisung timba tepsetba nguogo," ta linük police force nung ketdangsür tejen George Kakas-i ashi.

"Onok ajak kanga dang aoksar lir aser manga ayimer aser iba den tekoloka kanga dang belematokogo. Iba ya agizüksü kanga dang tasak lir," ta Kakas-i ABC dang ashi.

AFP news agency-i ashiba

agi, police-i lendong atalokba tesem nungi video aser noksa tem agizükogo, kong azü agi yangbanger aliba tasü mangtem lenmang tezülen merepshia aliba aser gari ka nung tasü mangtem nangdener aliba nguogo.

Agency-isa, military-i iba tesemi sepai noklangka shi yoker lir ajisüaka parnokia kecha mesüteter kechiyong kin balala nungi raratem ya parnok dang nungi kanga agi timba lir.

Linük yimtiba Port Moresby nung Ato Kilonser James Mara-i aniba sorkar anemertemi takaratiba nung jenjang tapet agitsü ayongzüko, kong iba tesemi sepai talila yoktsüba densema lir.

Nagaland-i Col. C.K Nayudu Trophy Plate final kokogo



Dimapur, Tsüklai/February 19 (TYO): Col. CK Nayudu Trophy 23/24 plate final nung Nagaland team-i Meghalaya koka Domestic Season takok nung tembangogo.

Hombarnü Nagaland Cricket Stadium nung asaya nung wicket 22 tashi out asüba ajangshio.

Final asaya tananübuba nung Nagaland team wicket ka out sür run 58 agi Meghalaya team memenepi tenzük aser iba sülen parnoki junga masayateti run 59 dang yanglur asayar tekuprongla out süatok aser parnok run ka agi tejakdang liasü. Nagaland team nungi captain Hem aser batsman tem rongnung ajak dang temulung alemtsü akteba batsmen Afzal

na run out asüba ajanga team jenjang kanga mejungi aküm. Parnok rongnungi Mughavi-i out mesüi run 62 yanglua liasü.

Ajisüaka tanabuba innings nung Meghayaly nunger batsman temia junga masayatet aser parnoki run 54 dang yanglur ajak out süatok.

Nagaland team bowler tem rongnungi Neizekho-i aonba ball Meghalaya nunger asayartemi masayatet aser pai final asaya nung wicket 9 agi kong tanabuba innings nung wicket 6 agiba densema lir. Bowler tem rongnungi ano Hem Bahadur-ia over ti nung run 24 agütsür wicket 4 agia liasü.

Meghayala team atema Bipin-i (11 runs) dang run ter

da tema yangluteta liasü.

Asaya akoktsü atema run 53 arishiba mapang Nagaland team-i iba run ya asayar 3 out sür menepa iba asaya wicket 7 agi kokogo. Iba asaya akokba sülen Nagaland-i Col. CK Nayudu Trophy Plate Group takok marok ajungketogo.

Nagaland tebur team jenjang balala ajak nung taküm kanga junga asayaogo. Nagaland team-i Cooch Behar (U-19) aser Col. CK Nayudu (U-23) asayamung kokogo. Asayamung anaprongla final nung parnoki Meghalaya koka liasü. Under 16 aser Senior Men's (Vijay Merchant and Ranji Trophy) team semifinal nung Meghalaya aser Hyderabad nati tsükdakja liasü.

Paris Olympics nung asayatsü atema Pacquaio-i benokba IOC-i magizük

Tsüklai/February 19, 2024

(Agencies): International Olympic Committee-i nungtugu boxing asayar Manny Pacquaio Paris Olympics nung asayadaksütsü atema temzüng ozüing memelenshitsu. Pacquaio ya entry limit dang nungi küm pongu agi tambu lir.

Pacquaio shiba 2021 küm asaya nungi anenogo, pa arishi küm 45buba nung Paris Olympics nung asayaner, kong medal bouts ya Roland Garros tennis complex nung asayatsü lir.

IOC-i Deobarnü Philippines nung Olympic keddangsurtem dangi shiti ka yokogo, kong boxer tem küm 40 tashi dang asayadaksütsü atema atakzükja aliba memelenshitsu ta shiogo. International Boxing Association governing body magizüki akümiba sülen IOC-i Olympic nung boxing asaya achaayanga arudar.

Olympics nung boxing asaya atema küm tatakzük ya 34 aliba 2013 küm 40 kümtsü. Iba jenjang agiba sülen Pacquaio 2016 küm Rio de Janeiro Olympics nung asayateter lila, ajisüaka iba mapang pai shilem magitsü asoshi telemtetba agi, kechiyong pa linük nung senator

asütsü shima liasü.

Iba ita Italy aser May ita Thailand nung Paris Olympics atema qualification tournament ana asayatsü aliba nung Pacquaio-i shilem agitsü magitsü mejangja.

Philippines Olympic association-i, Paris Summer Games-i aitsü atema "universality" entry angutsü asoshi merandangtsü jembidangogo. Iba ya Olympics nung asayar ishika dang asayaba aser qualify mesütetba linüktem nem agütsüba maongka ka lir, kong asayartem qualification majangtetaka asayatsü melar.

Ajisüaka IOC-i Deobarnü Philippines dang, parnok iba maongka agitsü atema temsüa mali ta metetdaksüogo.

"Universality jenjang ya taoba Olympics asaya ana tashi nung kija asaya ti dak tema asayar aliba linüktem nem magütsür," ta IOC-i ashi.

Pacquaio ya 2021 küm September ita arishi küm 42 asüba mapang asaya nungi anen. Pa asaya 72 nung shilem agiogo aser iba mapang world title 12 benogo, aser pai weight divisions ti tashi nung title bona otsü tasen ka yanglur lir.

52buba ASA wrestling asayamung March 16 nü asayatsü



Kohima, Tsüklai/February 19 (TYO): 52buba senior Naga style wrestling asayamung ayongtsü atema Angami Sports Association (ASA) renemdar. Iba asayamung ya March 16 nü Khouchiezie (Local Ground) Kohima nung asayatsü.

Iba osang ya ASA tir, Lhoubeizo Kesiyie-i Nagaland Olympic Association (NOA) complex kübok Chekrovolu Hall nung osangbenertem den sensaksemba mapang metetdaksü.

Pai, ASA ya Angami region nung saisapong lokti tentet rongnung tejentiba ka lir, koba 1967 küm tentet aser küm 57 jungogo. Küm 4-5 tawa adokba ya tetenzüklen küm ana nung khen asayaba ajanga lir ta ashi.

Paisa, ASA - Northern Angami Sports Association (NASA), Southern Angami Sports Association (SASA), Western Angami Youth

Organization (WAYO) aser Chakhroma Youth Organization (CYO) nungi wrestler terpongungu yoktsü aser ajak senteper asayar 60-i iba asayamung nung shilem agitsü, ta metetdaksü.

ASA asayaamung nung shilem agitsü atema wrestler ka mezüngbuba khel (sector) asayamung nung asayatsüla aser iba sülen yimtsüng aser tzükong jenjang nung tokteptsüla, ta pai ashi.

Iba asayamung nung ajak senteper senpet sen lakh 10 agütsütsü aser iba nungi takoker nem senpet sen lakh 2.5, runners-up nem lakh 1.7, tasembuba nem lakh 1.3, pezübuba nem lakh 1, quarter finalist tem nem sen 20,000 aser best tactic wrestler nem senpet sen 15,000 agütsütsü.

Kesiyie-i ashiba agi, temalen shisema aliba senpet tem den külemi ano wrestler tem nem asayamung nung shilem agiba

taah agütsütsü, koba tang mezüngbuba agütsütsü lir.

Paisa, March 16 nü ASA asayamung ya nisung 15-16000-i repringtsü imlar, ta ashi. Maneni pai, local ground nung asayamung ayongzükja asayatsü atema temelaba agütsüba atema Kohima Smart City Chief Executive Officer, K. Theunuo dang kanga pelaba lemsatep.

Asayamung nung shilem agiba wrestler 60 nungi taruba Nagaland Wrestling Association (NWA) asayamung nung ASA tenüng nungi shilem agitsü atema asayar 18 shimtsü ta tiri ashi. Iba asayamung ya March 26 nü asayatsü.

Ticket ya donor atema 2000, menden nung amentsüpur atema sen 500 aser gallery atema sen 100 ka asütsü, ta pai ashiba den nüburttem dang taruba Angami wrestling meet 2024 arua repringtsü ayongzükja liasü.

INDIA OSANG : Tapak 3 nungi...

Centre-i aluyimertem dang nungi MSP..

Minister of Commerce and Industry-i ashiba agi, chiyongtsü alizüktsü asoshi kecha tatakzük ka malitsü aser iba atema portal ka amenoktsü.

Goyal-isa, iba sentong ajanga Punjab nung aluyimba kümzükja toktsütsü, groundwater table tajungba kümdaksütsü aser ali tapong küma aoba nungi kümzüktsü, ta ashi.

Union Minister-i ashiba agi, aluyimertemi parnoki mendi lu yimnür saka jenjang MSP küboki aluba mapang takoksa ajangshiba nungi jenboja liner ta shiogo.

Kasa mapang nung Goyal-i ashiba agi, tanga

takhangbatem ya policy balala dak raloka lir aser iba atema sensaksem kanga junga makaibo telemtetba ka magitetsü.

Maneni aluyimba lokti tentet lenir Jagjit Singh Dallewal-i ashiba agi, MSP dak sendakba nung ozüing ka, Swaminathan Commission's recommendations aser loan taitoktsüba amaka onük balala senden nung sensaksemogo.

Taoba hopta Punjab nungi aluyimertem linük yimtibai ao tenzük. Ajisüaka parnok Punjab aser Haryana na arrtsü nung Shambhu aser Khanauri point nung security personnel temi sota liasü.



Nagaland Masters Games Association-i, 6buba National Masters Games 2024 nung medal angurtem nem tenüngsang agütsüba sentong ka Hombarnü DDSC stadium nung ayongzükja agiogo.

BILEMDANGANG

"Tesayuba melira lokti tangar menepa motettsü."